

Dithero tsa Tirelano mo Kutlwanong

49/2014 Ka Sontaga 15 morago ga moletlo wa Modimo o o Borarobongwe, e le ka 28. 09. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

Lefoko le le okamelang beke eno lilotshiwe ku-1 Petr. 5:7, le re: **"Latlhelang matshwenyego otlhe a lona mo go one, gonne lo tlamelwa ke one."**

1. Sefela sa - - 319/331

2. Thapelo: Morena, Modimo, Rara yo o mo legodimong, re lebogela ditiro tsa gago tse o di re diretseng go tswa mo ttholegong ya rona, tsotlhe tse di bonalang, le tse di sa bonaleng. Ke gona re go kopang gore o re thuse, rona mmogo le botlhe ba ba gatang mo lefatsheng leno gore re ipolele gore tota ke wena Motlhodi, ke wena Mmoloki, re be re lemoge gore ke tshwanelo gore re go obamele ka pelo yotlhe. Atisa ka metlha bontle mo mmung, le mo lefatsheng lotlhe le le bidiwang ka leina la gago. Koba komelelo ya Lefoko la gago gore melomo e e go latolang e didimadiwe ka dikgakgamatso tse o di dirang ka leina la ga Jesu Keresete, Morena wa rona. Amen.

3. Lefoko la Testamente e kgologolo lilotshiwe ku-Genesi 2:4b-15;

Epistolo ka fa thulaganyong ya 2 e kwadilwe mo go 1 Petoro 5:5-11;

Efangele ka fa thulaganyong ya 1 e kwadilwe mo go Matheo 6:25-34.

4. A go ipolelwe tumelo ya bokeresete!

5. Sefela sa 186 - 172/179

6. Thapelo ya mmadi wa thero.

7. Lefoko ka fa thulaganyong ya 6 le kwadilwe mo go Genesi 2:4b-15, le re: "E rile ka motlha o MORENA Modimo o dirileng lefatshe le legodimo ka ona ga bo go ise go nne ditlhatshana dipe tsa naga mo lefatsheng, go ise go mele botala bope jwa naga; ka gonne MORENA Modimo o ne o ise o nese pula mo lefatsheng; le gona go se na motho yo o ka lemang naga. Fela ga tla mouwane mo lefatsheng, wa kolobisa mmu otlhe wa naga. Ke fa MORENA Modimo o bopa motho ka lerole la mmu, o budulela mowa wa botshelo mo dinkong tsa gagwe; motho

a nna motshedi jalo. Jaanong MORENA Modimo wa dira tshimo kwa Etene mo ntlheng ya botlhabatsatsi, wa baya motho teng yo o mmopileng. MORENA Modimo wa tlhogisa ditlhare tsa mefutafuta teng, di medile mo lefatsheng, e le tse di eletsegang mo matlhong, tse di monate go jewa. Setlhare sa botshelo sa bo se le fa gare ga tshimo mmogo le setlhare sa kitso ya molemo le bosula. Noka ya bo e tswa mo Etene go nosa tshimo eo; fa e sena go tswa teng, ya kgaogana, ya nna dinoka di le nne. Leina la ya ntlha ke Phišone; ke yona e e potologang lefatshe lotlhe la Hawila kwa gouta e leng teng. Gouta ya lefatshe leo ga e a pekwa; teng go na le boreku jwa Bedula le majwe a a tlhokegang a Šohama. Leina la noka ya bobedi ke Kihone; ke yona e e potologang lefatshe lotlhe la Ethiopia. Leina la noka ya boraro ke Hitekele; ke yona e e elang mo ntlheng ya botlhabatsatsi ya Asiria. Noka ya bone ke Ferathe. MORENA Modimo o ne a tsaya motho, wa mmaya mo tshimong ya Etene gore a e leme, a e dise." Amen.

8. Thero: Phuthego ya Morena, e e rategang mo Moreneng wa rona Jesu Keresete, Lefoko la thero ya kajeno le re ruta ka ga tlholego ya legodimo le lefatshe. Ke re: Ke yona thuto e kgolo ya thero ya kajeno. Modimo ke Motlhodi yo o dirileng tsotlhe tseo, o di re direla, nna le wena gore re laole, re tlhokomele tlholego yotlhe e Modimo o e tlhodileng.

Phuthego, ga go na sepe se se tlhagileng ka bosona, mme Modimo o buile Lefoko, tsotlhe tsa tlhaga ka Lefoko la ona. Go makatsa go utlwa batho ba ba reng: Tsotlhe di tlhagile ka botsona, di itlhasititse. Seo ke maaka tota! A wena o a dumela gore Modimo o teng? A o dumela mo Modimong Rara le Morwa le Mowa o o Boitshepo? Fa o dumela jalo, o dira sentle. A re tlhokomeleng gore Satane o itse boammaaruri jo, gape o a bo dumela, mme ene Satane le mephato ya gagwe ga ba nke ba ipolela gore Jesu ke Morena. Gopola gore go ipolela ka molomo fela ga go pholose, gonne tumelo ya nnete ke go kopana le Morena Jesu, le go itshwarelela mo go ene, le go mo rata ka pelo yotlhe, le go leka go tsamaya, le go tshela ka fa Lefokokong la gagwe.

Lefoko le re: Ga go na, le e seng merogo, le fa e le eng, mme Modimo o dirile gore dilo tsotlhe di nne teng tse di thusang motho mo lefatsheng, le gore motho ga a kgone go tshela ka tse di mo lefatsheng fela. Fa pula e na, dimela di a mela, di nne tse dintle mo lefatsheng go feta mo tshimologong. Re itse gore sekaka ga se lebege sentle, le matlho ga a se tlwaele, le e seng go se itumelela. Gape metsi a tlhokega teng. Le mariga a ntse jalo. Matlho a rona ga a bone bontle jwa botala mariga, mme tsotlhe di swabile, di kgakgabetse. Se se gakgamatsang ke fa merafe yotlhe e itse gore Modimo o teng, mme ga e o boife. Le fa batho

ba itshupa gore “go dira ka fa molaong go kwadilwe mo dipelong tsa bone, digakolodi tsa bone di ntse di supa jalo le dikakanyo tse di ba latofatsang gongwe di ba latofolole.”

Go diragala jang, fa go na le dipotso tse dintsi mo go kalo malebana le tlholego ya Modimo? O boletsang ka gore Modimo o kae? A ga o bone gore lefatshe le tsotlhe tse di mo go lona? Letsatsi, dinaledi, ngwedi, melapo, ditlhapi le diphologolo le ditshedi tsotlhe tsa lefatshe? A tsotlhe tseo ga di go bolelele sepe ka ga Modiri yo mogolo? Motho o gopolang gore o tlhodilwe ke mang? A ene o itirile ka boene? A ga se Modimo, Morena wa barena yo o tlhodileng motho? Motho wa Modimo ke wena, dipotso tsotlhe tseo ke di tlogela mo diatleng tsa gago gore o di arabe ka tlhokomelo. Bona lorato lo logolo lwa Modimo lo o ratang motho wa tatlhego yo o tlhomolang pelo ka lona! Gopola Modimo o o leng teng mo lefatsehng le mo legodimong. Ke se se gakgamatsang, fa re sa o tumise, le e seng go o leboga, mme dinonyane tse di ntseng mo dikgageng gongwe mo ditlhareng tse di gaufi le dinoka di a o tumisa, le go leboga Modimo ka mantswe a tsona.

Ke nnete, bakaulengwe! “Morena o itse popego ya rona, o gopola, fa re le lerole,” Pes. 103:14. A le rona re gopoleng gore re lerole. Re a utlwa gore “Modimo o bopile motho ka lerole la mmu, wa budulela mowa wa botshelo mo dinkong tsa gagwe; motho a nna motshedi jalo.” A re tlhokomeleng gore motho o tlhalefile jang go feta mefutafuta ya dilo tse di tshelang fa pele ga matlho a Modimo, gongwe fa pele ga sefatlhego sa ona. A re gopoleng le temana e e reng: Modimo wa re: “Lefatshe a le ntshe ditshedi ka fa mefuteng ya tsona!” Mme morago wa re: “A re direng batho, ka fa setshwanong sa rona ba ba tshwanang le rona gore ba laole ditlhapi tsa lewatle le dinonyane tsa legodimo le diruiwa le lefatshe lotlhe le dilo tsotlhe tse di gagabang fa fatshe!” Wa dira motho gore a laole tsotlhe tseo. Fa re bona Modimo wa kgololesego o o ikanyegileng mo loratong lwa ona gore motho e nne yo o tlotlegileng mo go kalo, le gore botshelo jwa gagwe bo feta jwa ditshedi tsotlhe tse dingwe. Re itse seo, gonne Modimo o dirile motho ka fa setshanong sa ona.

Rea gopola gore motho o dirilwe a se na sepe se se bosula, le e seng boleo gore a lebe Modiri wa gagwe ka go amogela bopelotlhomogi, le tshiamo ya Modimo, a o ikanye, a o utlwe ka lorato lwa nnete, lwa botlalo. Tsotlhe tse re nang le tsona re di diretswe ke Modimo, mme ga go na motho yo o direlang Modimo ka fa tthagong ya gagwe. Jaaka lefatshe le tse di mo go lona o di dirile, di dirilwe ke Modimo. Ke tshwanelo gore re di tlhokomele sentle jaaka batlhokomedi ba ba ikanyegileng. Ka moo tsotlhe tse di molemo tse re di amogelang mo

Modimong, re tshwanetse go di lebogela, re o galaletse, re o direle, re o ikanye, re o utlwe. Ke gona re bona gore motho o latlhegetswe ke setshwano sa Modimo, gonne batho ba ntlha ba ikgaogantse le ona ka go sa utlwe ga bone, ba ja mo setlhareng se se neng se le mo gare ga tshimo ya kwa Etene. Ka go sa utlwe ga bone ga tsena boleo le matshwenygo le loso mo bathong botlhe, Baroma 5:12-14. Le fa go ntse jalo Modimo ga o a re latlha, gonne o solofeditse Motšhwetli wa tlhogo ya noga. Ee, Motšhwetli wa tlhogo ya noga o tllile, e bong Jesu Keresete, Mopholosi wa rona. Lebogang Morena, gonne o molemo, bopelotlhomogi jwa gagwe bo eme ka bosatkhuleng. Lebogang Morena, mowa wa me, o se ka wa lebala ditiro tsotlhe tsa bopelotlhomogi jwa gagwe!

Ga go na sepe, bakaulengwe, se re ka buang ka sona gore ke se motho a se direlang Modimo. Mme Modimo o tlhotlheletsa motho ka Lefoko, le ka didirisiwa tsa ona tsa boitshwarelo jwa maleo. Ka tsona Modimo ke Modiri, motho ke modirelwa. Modimo wa jwalela motho tshimo kwa Etene kwa botlhabatsati. Wa mmaya mo go yona. Bona manno a mantle mo go kalo a Atame a a tlogetseng ka go ineela mo boleong. Boleo bo kgaoganya motho le manno a mantle a a baakanyeditsweng ke Modimo. Dinoka tseo di ne di nosetsa tshingwana ele. Gopola gore mouwane ole wa tla mo lefatsheng, wa kolobisa mmu otlhe wa naga. Ke fa Modimo o medisitse ditlhare le dimela tse dingwe mo lefatsheng, ga bonala tse di jewang mo tshimong mmogo le setlhare sa kitso ya molemo le bosula. Ke Modimo o o dirileng tsotlhe tseo. Ga di a dirwa ke motho. Mo bofelong motho a amogela taolo ya Modimo gore a je maungo otlhe ka fa thatong ya ona, mme a se ka a je a setlhare sa kitso ya molemo le bosula, gonne fa a ka a ja, o tla swa le go swa.

Motho o beilwe mo tshingwaneng eo ka maikaelelo a gore a ithute go utlwa Modimo, gape a e leme, a e tlhokomele, ka mafoko a mangwe: A e nne motlhokomedi le modisa wa yona. Motho ga a ka a ikisa mo go yona, mme Modimo o mmeile mo go yona. Go na le batho ba ba nyatsang Modimo ka go botsa gore o ba tsenyeditse teng, a go ne go sa diragale gore Modimo o ne wa ikaelela gore motho a wele mo boleong. Ga go a nna jalo. Seo ke maaka. Modimo o mmeile teng, mme e rile batho a ole mo boleong, Modimo o re file Jesu gore e nne tefelo ya maleo a rona gore a re ruanye le Rraagwe, re boele mo go ene. Bona lorato lwa Modimo lo lo fetang tlhaloganyo le kitso ya rona, Ke lorato lwa ona. A re lo amogeleng, re se tloge mo go lona, le e seng mo bopelotlhomoging jwa ona. Modimo o a re tlhokomela. Mme rona re dirang? Modimo ke Modiri. Ga go na motho yo o diretseng Modimo. Re diretswe, re ratilwe mo go kalo ke Jesu Keresete. O re ratile go ya mo losong. Amen.

9. Thapelo: Morena, boloka go tswa le go tsena ga rona mo leineng la Mopholosi wa rona Jesu Keresete. Amen.

Thapelo ya Morena: Rara wa rona yo o mo legodimong ...

10. Sefela sa 237 - 222/230

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. Mkhabela, ka ngwaga wa 2008/2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.